

Govor prvog zamjenika visokog predstavnika Raffija Gregoriana prilikom 10. godišnjice osnivanja Granične policije BiH



Granična policija je priča o uspjehu

Ekselencije, gospodine direktore Dumančiću, gospodo direktori policije, članovi Granične policije, dame i gospodo,

Danas obilježavamo 10. godišnjicu Granične policije BiH. Ovo je istovremeno i druga godišnjica početka pregovora između Bosne i Hercegovine i Evropske unije o ukidanju viza za građane BiH koji putuju u EU.

Rad Granične policije od ključne je važnosti za uspjeh tih pregovora i danas mi je posebno zadovoljstvo pohvaliti zaposlenike ove agencije za usluge koje obavljaju za građane Bosne i Hercegovine. Svaki dan u godini oni daju nemjerljiv doprinos težnjama BiH da se pridruži EU, nemjerljiv doprinos sigurnosti i uslovima za putovanje u BiH i nemjerljiv doprinos razvoju međunarodne trgovine. Na tako puno načina Državna granična policija nalazi se u prvim redovima kada je riječ o budućnosti BiH.

Iako su vijesti o preporuci Evropske komisije za liberalizaciju viznog režima zadovoljavajuće, sada dolazi teški dio održavanja potrebnih standarda EU kako bi ta liberalizacija postala stvarnost. Granična policija mora i dalje dobijati finansijsku, logističku i institucionalnu podršku koja joj je potrebna. Nedavno otvaranje novih ispostava u Trebinju i Bijeljini ohrabrujući je znak da Granična policija ustanovljava odgovarajuće moderne strukture na terenu. Ali, Graničnoj policiji je teško izvršiti sve zadatke kada neki politički lideri dovode u pitanje legitimitet državnih institucija i traže smanjenje sredstava za više od 20% za državne institucije kojima i ovako nedostaje osoblja i resursa, kako bi mogli povećati javnu potrošnju u entitetima.

Da raskrstimo sa dezinformacijama o ovom pitanju: prema članu III Ustava BiH država je odgovorna za provedbu međunarodnog prava i za međunarodne komunikacije, u šta spadaju i granični prelazi. Budući da se država prije više od deset godina obavezala da će štititi granicu, Parlamentarna skupština BiH usvojila je odluku visokog predstavnika o Graničnoj policiji, a nakon toga u nekoliko navrata i amandmane na zakon sa ciljem povećanja njene efikasnosti. Bez obzira na to, Granična policija i dalje nema dovoljno zaposlenih, a kako sam saznao tokom vlastitih posjeta graničnim prelazima, nedostatak određene opreme poput opreme za noćno osmatranje, senzora i slično, i dalje predstavlja problem.

Resursi su, naravno, neophodni, ali Granična policija ne može raditi svoj posao bez dobrih radnih odnosa sa partnerskim agencijama u susjednim zemljama. U vezi s tim, zadovoljstvo je vidjeti da je prekogranična saradnja sa Srbijom, Hrvatskom i Crnom Gorom uspostavljena i ojačana na svim relevantnim nivoima i sa opipljivim rezultatima: poboljšano je presretanje, smanjen obim prekograničnog kriminala, a putovanja se lakše odvijaju.

Želim pohvaliti direktora Dumančića i njegov tim za vođstvo i

sposobno upravljanje Graničnom policijom i za stabilnost i profesionalizam koji su uveli u ovu instituciju. Čestitam im na dostignućima i dajem podršku da nastave sa istim rezultatima na početku drugog četvorogodišnjeg mandata direktora Dumančića.

Dok obilježavamo 10. godišnjicu Granične policije, pred nama se nalazi multietnička agencija uspostavljena u cijeloj zemlji, opremljena najmodernijom opremom, koja profesionalno izvršava kompleksne i zahtjevne zadatke i konstatno se trudi da poboljša vlastitu efikasnost. Ona je praktičan primjer kako država može – i treba – da služi svojim građanima. Kao što sam rekao na početku: Državna granična policija se na tako puno načina nalazi u prvim redovima kada je riječ o budućnosti BiH i svi mi imamo interesa za njen – za VAŠ – uspjeh. Čestitke i moja lična zahvala zaposlenicima Granične policije, ali i njihovim porodicama, čija žrtva i podrška koju daju svojim najmilijima pomaže da sve to bude moguće.

Hvala!